



Tir Yimyim

www.tirymyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tirymyim@gmail.com

TAPAK 3

Yangia anidakangma :



Tir Yimyim



tir_yimyim



tir yimyim

TAPAK 8

PM Modi-i tzümetsüng agi
kongshiba state tem semdangtsü

Suarez nem asaya trok
atema tenokdangba agütsü

VOL. XXII ISSUE NO. 324 (ADOK 324)

DIMAPUR

AMUNGNÜ (SUNDAY)

RONGJUI (SEPTEMBER) 07, 2025

₹ 5.00

CMHIS kübok Yashoda mozüki aser Nagaland sorkar nasendaktepogo



Yashoda Hospitals ketdangsertemi osangbener den jempidang tangokba noksa angur.

Dimapur, Rongjui/ September 6 (TYO): Yashoda Hospitals, MR-Linac treatment, state of the art cancer radiation therapy atema Nagaland nungi mezüng shiranger agizüksü asoshi hospital nung renema lir. Pai ashiba agi Yashoda Hospitals nung medical trip aser hospital accommodation sentong atema patient tem yaritsü atema help desk balaka ka mejeta amenokogo.

Chief Marketing & Strategy Officer, Yashoda Hospitals, Karthihaivelan-i ashiba agi, CMHIS den yaritepa ita ka dang lir külen hospital nung Nagaland nungi patient tem indang inquiries 200 dak tema agizükogo. Tang Nagaland nungi shirangertem nem senotsü

khuret meli-i world class treatment agütsütsü akok.

MR-Linac treatment, state of the art cancer radiation therapy atema Nagaland nungi mezüng shiranger agizüksü asoshi hospital nung renema lir.

Pai ashiba agi Yashoda Hospitals nung medical trip aser hospital accommodation sentong atema patient tem yaritsü atema help desk balaka ka mejeta amenokogo.

Pai ashiba agi, Yashoda Hospital-i taruba ita tashi nung Dimapur aser Kohima na nung OPD service tenzüksü aser Hyderabad nung operation aser treatment agiba atema local follow up care agütsütsü.

NPF aser NDPP ka küma lokteptsü atema inyaker: MLA Azo

Kohima, September 6, 2025 (TYO): "NPF aser NDPP ka küma lokteptsü asoshi mapa inyakdang party lennir aser züngsem ajaki aremzüksü, angatettsü aser yimyatsüya tajung bentshütsü mepishir" ta NPF MLA Kuzholuzo Azo Nienu-i ashi.

"NPF ya Naga yimten tebilemstü kümzüka ayur ka ama lir aser tanga political party ama masü asenoki Naga national movement nung tera yanga lir. Asenok tanü MLA 2 dang lir aser tarutsü nung malitsü-a akok saka iba party ya Naga nunger azü aser putiotsü nung maneni alitsü" ta pai ashi.

NPF aser NDPP regional party ana lokteptsü atema maparen tenzükogo aser iba ya Tsüngremi shisatsü agüja inyakba mapa ka lir. Iba asoshi NPF aser NDPP lennirtem aiben ajurutepa olemtepogo ta Azo-isa ashi.

"Ajak dang tongtipangbaji Chief Minister Neiphiu Rio lir aser pa lenisüba ajanga dang iba maparen tejakleni otettsü. Pai

hai ta meshira iba ya mataloktsü" ta paisa metetdaksü.

"Iba maparen ya kanga dang kümdanga inyaksüla aser lennir o züngsem ajaki tashi angatsüla aser peii bilemba mashii mejembitsüla. O tila ka ajanga dang tulu ka akümtsü akok. Yimtenren tsütsü kati ka den toktepba aser tesüba nung tako chitepa aliba ajanga iba maparen nung tetsükdaksü bentsür marutsüla" ta Azo-isa tekümdangtsü olen ka ashi.

"Naga nunger ajaki tashitait regional party ka lidaktsünür. Nagaland ama state tila ka nung regional party ana liyonga moutettsü" ta paisa ashi.

Azo Nienu-isa party züngsem ajak dang pei pei jenjang mezüngshitsü saka küm aika Naga lennirtem anir aruba taremzü, tangatet aser koktetba tangatetba nung temulung agütsütsü ayongzü.

"Asen tarutsü aser tia ya meimchiri masü saka Tsüngremi dang renemer. Naga nunger ajungtsü atema asenok ajemalur külemi jajadi" ta Azo-isa ashi.

NPF-i to CM Dr. Rio dang tanaben party nung adentsü ayongzüker Apong Pongener-i NPF President menden toktsütsü mulunga lir

Kohima, September 6, 2025 (TYO): Honibarnü Naga People's Front (NPF) Central Executive Council (CEC) ajanga bangzüng aika renemogo aser item rongnung Chief Minister Neiphiu Rio dang party-i meyipa arutsü aser lenitsü mepishiba ka dena lir.

"CEC ya NPF asoshi lemtet agiba tematiba telok lir aser February 12 nü bangzüngtepa aliba ama taoba züngsemtemi bilemdanger tanaben NPF tashi itdaksütsü atema adentsü ayongzüksüba lir" ta MLA aser NPF Secretary General Achumbemo Kikon-i osangbener dang ashi.

NPF CEC-isa Chief Minister Neiphiu Rio dang 1970s mapang pa political career tenzükba party nung tanaben adentsü mepishiba metetdaksü. Iba mapang party tenüng United Democratic Front (UDF) liasü.

Rio-i 1974 nung Kohima Youth Wing President inyak aser iba sülen lenisüba menden balala nung mena aruogo. Rio atema NPF ya "original political home" lir ta Achumbemo-i ashi.

Regional tangatetba aliba MLA aser ex-MLA tem den MP ana aser MLA 60 prong longjemmer regional front tashitait ka yangertsü ayongzüker. Naga tebilemstü tejakleni bener aotsü atema regional political mapa inyakertemi NPF nung adentsü mepishir ta CEC-i metetdaksü.

Rio-i NPF nung denra NPF President Apong Pongener-i menden toktsütsü mulunga lir ta ashiba atema tenüngsang agütsür ta NPF CEC-isa metetdaksü. CEC senden nung jembidang Apong Pongener-i iba osang lemsatapa liasü.

Pei menden yutsütsü tangatetba ya putepshiba aser telongjem asoshi mera tulu agiba lir ta Achumbemo-i ashi.

CEC-isa party lenisüba nung temelenshi kar asütsü ajurura president-i Central Election Board ka tentettsü tashi agütsüogo.

"NPF-i Naga yimten latettsü atema mapang talangka inyaka arur aser tanü iba ta ataloktsü atema longjema aiba regional political force ka nüngdaker. Nübo teimba masü saka regional party ajak longjemtsü aser Naga

nunger tejakleni anir aotsübaji kanga tongtipang" ta Achumbemo-isa ashi.

September 6, 1964 nü mezüngbuba Indo-Naga ceasefire sign sütepba bilemteta tanü CEC senden nung sarasadem mapang ka agia liasü.

NDPP züngsem kari NPF den ka küma lokteptsü memulungba atema asüngdangdang "kija tangatetbaji balala asütsü akok saka lenisüba atema külemi lemtet agibajisa tajungtiba lir" ta Achumbemo-i langzü.

NDPP-i kodaser NPF nung adentsü ta osangbenerisa asüngdangdang "iba ya nübo atema masü. NDPP 32 aser NPF MLA 2 dang lir saka iba ya regional ola ulutsüba aser Naga yimten taginüba akangshitsü atema lir" ta paisa langzü.

"Tanü lemtet agiba ajanga mapa tajung ataloktsü imlar. Tsüngremi asenok yaritsü aser sayatenya ka ataloktsü amanger. NPF aser NDPP lokteptsübaji asangsang nung ataloktsü. Onoki longjemnür, putepshinür aser Naga loktiliba den yimjung maparen tejakleni anir onür" ta Achumbemo-isa ashi.

"Chief Minister Dr. Neiphiu Rio nem NPF len anidaktsütsü atema menden toktsütsü mulunga lir" ta NPF President Apong Pongener-i tanü NPF CEC senden nung ashi.

"Naga nunger külem taginüba aser party-i Naga yimten aser putiotsütem kümzüka ayutsü atema inyaka aruba nung ajemdaker iba ya mulungtetogo" ta Apong Pongener-i ashi.

"Dr. Neiphiu Rio-i 1970s mapang United Democratic Front (UDF) nungi pa yimtenren mapa tenzük. Iba sülen pai NPF nung lenisüba mapa balala inyaka aruogo anungji maneni NPF nung dennür lenisüba mapa inyaksü ayongzüker" ta paisa ashi.

"Party tashi itdaksütsü aser regional political tangatetba tejakleni bener aotsü atema ni NPF President nungi anentsü ashir. Dr. Neiphiu Rio-i tanaben NPF nung adentsü mulungra ni kü menden yutsütsü aser pa nem len anidaktsütsü" ta Apong-i ashi.

"Rio-i party takok ngudakja len aniogo aser pa tanaben party nung adenba ajanga Naga yimten

latettsü asoshi inyakba mapa tashi itshitsü" ta paisa ashi.

"NPF ya mezüngbuba regional party lir aser 1963 küm tentetba sülen nungi Naga maitsü aser yimten taginüba wazüka ayutsü atema bendanga agüja inyaka arur" ta NPF president-isa metetdaksü.

"NPF-i Naga yimten latettsü atema bendanga agüja inyaka arur, 1964 ceasefire maparen nung yaritep aser yimjung maparen pusema 1998 nung elections nung shilem magi" ta paisa ashi.

"Taoba party züngsemtem aser talisa Chief Minister Dr. Neiphiu Rio-i tanaben party nung adentsü ayongzüker. Rio-i United Democratic Front nung lenisüba mapa inyaksü tenzükba nungi Chief Minister jenjang tongogo. Pa tanaben NPF nung adenba ajanga NPF-i Naga nunger yimtenren aser putiotsü temeten atema inyakba maparen tashi aittsü" ta Apong Pongener-isa ashi.

NPF President-isa Manipur nung President's Rule benokba magizükba metetdaksü.

Manipur nung yimjung aser terenlok alitsü atema timi shimtetba sorkar ka nem ketdang südaksütsüla ta Apong-i ashi.

"Party lennir aser züngsem ajaki pei jenjang aser taginüba toktsür NDPP den ka küma lokteptsü atema aremzüksü, angatettsü aser tashi angatsü ayongzüker. Asenok külemi NPF tashi itdaksütsü aser asen nübotem taginübatem tongteta inyakdi" ta Apong Pongener-isa metetdaksü.

NPF CEC senden nung Chakhesang Baptist Church Ministers' Hill Kohima Senior Pastor Rev. Dr. Vevo Phesao-i anir Naga nunger atema sarasadem.

Senden nungsa NPF Arunachal Pradesh Unit president Happa Taidong aser Manipur president & MLA Awangbow Newmai natia o jemb.

Senden nung senior vice president Blaise Ihelung menden liasü aser NPC Central Women Wing advisor Padmashri Sano Vamuzo-i temoatsü meshia sarasademmer tenzük.

Kinungtsü südaksüba atema merenshi

Dimapur, September 6, 2025 (TYO): December 2018 nung Mokokchung kübok Arkong Ward nung nisung kati pa kinungtsü züka merenshiba sülen asüba ken o atema okadaki obendang agütsüogo.

Principal District and Sessions

Judge, Mokokchung Victo Sema, NJS okadaki obendang agütsüba nung Imkongtemjen-i asa-a yirutsüba atema küm 7 rigorous imprisonment (R.I.) den Rs. 2,000 senchi chiogo.

Okadakisa Section 352 IPC kübok pa ita 3 tepuokdak ayutsü

aser ano Section 304 Part II IPC kübok küm 10 RI asütsü temerenshi agütsü.

Imkongtemjen-i senchi magütsüra ita 3 simple imprisonment (S.I.) asütsü ta Principal District and Sessions Judge-isa metetdaksüogo.

Kohima Police-i teküp ayokba maparen makdok



Dimapur, September 6, 2025 (TYO): Kohima Police-i tanur tetsür ka meimchir shibelenba aser tashiyim agi shi nung medemba nungi kümzükogo.

Kohima police-i sex trafficking network ka makdokogo aser iba dak sendakba nung nisung 9 apu ta PRO, Kohima Police-i metetdaksü.

Nisung ka samaba atema bushisüngdanga aruba sülen Kohima Women Police Station nung Suo-Motu FIR ka benoka liasü. Nisung samaba atema bushitepa arudang August 30, 2025 nü Kohima nung hotel ka nungi tetsürla kümzükba liasü.

Tetsürla kümzükba sülen la nem medical teyari aser counseling agütsü aser lai police tsüngdang la tashiyim agi teküp yokdaksüba aser nisung aikati la den shi nung medemba ashi.

Tetsürlai ashiba nung ajemdaker police-i tai tonglokja

alir Neisedenuo apu. La dang asüngdangya asütsü la teküp ayoker ka aser ano tangar bushitsür ka ama mapa inyakba nangzük.

Neisedenuo-i Rakesh ta ser nisung ka kübok inyaksangshiba aser tetsürtem anepaluba nangzük.

Kohima Police-i osang tejangja bushitepba aser mita aoba ajanga Kohima nung sex trafficking network ka putet.

Item kulitem nung ajemdaker North PS aser Women PS nungi teshimtet telok kati tesemtem mita senzüdang temulung melemer aika apu.

Parnok rongnung locals aser non-locals dena lir aser parnok yagi sex trafficking atema organizers, pimps, aser agents ama inyaka aru.

Iba mapa tenzüksang Rakesh dang asüngdangdang pai Guwahati aser Shillong

nungi nisungtem anir aru aser Neisedenuo-i tetsürtem anepalu ta nangzükba liasü. Paisa tetsürtem dak tashiyim agi shi nung medemba nangzükogo.

Police-i bushisüngdanga arudang Neisedenuo aser Rakesh nati Kohima nung tetsürtem teküp yokdaksüba aser shibelenba bushiteta liasü.

Iba ken o nung tai tonglokja alir nisung 9 puogo aser parnok judicial custody nung lir. Bushisüngdang maparen ano metembang aser maneni shilem agirtem ajak puteta maitsü jangjatsü meranger ta PRO, Kohima Police-i sangdong ka nung ashi.

Kohima Police-isa public dang iba nung yariteptsüsa osang kar dang lira sangoktsütsü mepishia metetdaksüogo. Osang agütsürtem tenüng miimbanga ayutsü ta parnokisa ashi.

Assam Rifles-i sentong balala ayongzükba agi

Dimapur, Rongjui/September 6 (TYO): Assam Rifles-i ayongzükba National Integration Tour nung shilem ka ama PM Shri Government High School, Yangphi, Kiphire nungi tsayur 2 aser kaketshir 20-i Rashtrapati Bhawan, New Delhi nung India tir den ajurutepogo.

Tir den sensaksemba ajanga lanur kaketshirtem kanga ajungmsogo, shirnoki iba maongka agütsüba atema kanga pelaba lemsatepa liasü. Tiri parnok dang nondak nondaka shisaluyimtsü aser linük terenlok atema jenjang tajung agütsü ajungshia liasü. Sensaksem ajanga kaketshirtem kanga ajungmesogo.

Iba senden amenba sülen parnok Rashtrapati Bhawan semdang, koba India democracy aser architecture temaitsüka lir. Kaketshirtemi stately halls, heritage galleries, aser Mughal Garden semdanga liasü. Iba tesem semdangba ajanga parnok mulung nung linük terenlok atema teyari agütsütsü asoshi khuret aser tejangraba ka inoktsüogo.

National Integration Tour kübok iba tajangshiba ya parnok asoshi ajak dang tongtibangba asütsü. Iba sentong kanga takok ngua agiogo aser kaketshirtemi parnok taküm tepeyong

bilemtettsü.

Kasa mapang nung AR-i ayongzükba, Assam Rifles Public School, Phek nung tesayurtem anogo kanga meraketa mungogo. Sentong nung kaketshir 42-i inyakyim balala ajanga parnok sempet tajung sayua liasü.

Kaketshirtemi, ken, jilushi, skit aser kongki balala tema shilem agia liasü. Item sentongtem ajanga kaketshirtem sangrasangji aser sempet sayuba dang masü saka parnok tesayurtem dang kanga pelaba sayur. Maneni kaketshirtemisa parnok pelaba aser akümtsübuba temaitsü tesayurtem nem sempet balala agüja liasü.

Iba anogo ano special "Thank You" wall ka toktsü, kong kaketshirtemi parnok tesayurtem dang kanga pelaba lemsatepa liasü. Iba inyakyim ajanga tesayurtemi kaketshir shia taküm nung kongshiba lepa repringshitsü aser tatishitsü keta parnok pelaba lemsateptsü asoshi maongka agütsüogo.

Truba putu lanurtem anitetba atema tesayurtem nem tenügsang aser tetushi agütsütsü nükjidong nung iba sentong ayongzükba agiogo. Sentong ajangsa, tesayurtem akümtsübuba, parnok nem tenügsang aser tetushi

agütsüba sobaliba ka tentetdaksütsü atema school bendanga agütsür aliba sayur.

Maneni Assam Rifles-isa, September 5 nü Wokha District kübok Bhandari nung "A Day with Company Commander" sentong ka ayongzükba agiogo. Iba sentong ya "Education - Learning beyond Classrooms" omen nung ajemdaker agia liasü.

Government Higher Secondary School, Bhandari nungi kaketshir 30 aser tesayur anati iba sentong nung shilem agi, kong Company Commander den sensaksemba, saisapong, Company Operating Base, gym semdangba aser chichiyongba densema liasü.

Iba inyakyim ajanga kaketshirtem textbook ajanga dang masü saka inyakyim balala ajanga angazüktsü ajungmesogo.

Ano AR-i August 25 nungi September 4 tashi G. RIO School, Kohima nung Work Education Programme ayongzükba agiogo. Sentong nung instructor temi First Aid aser Carpentry dak sendakba nung tangazükba agüja liasü. Iba sentong tajung ayongzükba katsüba atema school aser sentong nung shilem agirtemi kanga pelaba lemsatepogo.

Unity College nung Freshers' den repsema Annual Day mungogo

Dimapur, Rongjui/September 6 (TYO): Unity College, Dimapur nung September 6 nü 19buba Freshers' den repsema Annual Day mungogo. Iba sentong nung Director General of Police, Nagaland, Rupin Sharma, IPS tongti tejaoker liasü.

Sentong nung formal session ya Assistant Professor, Department of Commerce, Avitav Gupta lenisüba nung agi aser Police Baptist Church, Chümoukedima Youth Pastor, Imilmenba Jamir-i sarasademer tenzüka liasü.

Principal Dr. Lichumo Enie-i lokti pela agizükba o jembia. Sentong nungsa tejenpurtem tenüng nung BA 5th Semester (Education Major) nungi Nukshilemla Lemtur aser kaketshir tasentem tenüng nung BA 1st Semester (Political Science Major) Rohtsüpli Sangtam-i o jembia liasü.

Sentong nung o jembiba mapang Rupin Sharma-i, küm 35 tejakdang pa kaketshir asüba mapang bilemtetshia jembia. Pai, sobaliba tajungtem wazükba ayutsü aser maneni tejakdangi bener aotsü nungdakba lemsatepba den shisaluyim ya kaketshisatsü mesüra alirongsen aazüktsü atema dang masü saka iba ya yimayimpong tajung aser tangatetba tajung aketba nisung tajungba ka akümtsü asoshi lir, ta ashi.

Maneni angazüktsü nungdakba indang lemsatepba mapang DGP-i kaketshirtem dang metetnüba tanüla alitsü aser tasüngdangba balala asüngdangtsü asoshi aka malitsüla, ta ashi. Pai, ken o jangjashiba ya tashimaitba

temaitsüka masü, saka lenir ka asüba temaitsü lir, kechiyong iba ajanga pa aser pa meketa alirtem ajangzük, ta ashi. Kasa mapang nung pai tesayurtem dang, kaketshirtemi sadem sadema tasüngdangba balala asüngdangtetsüsa environment ka yanglutsütsü ajungshia liasü.

Maneni pai, alima melenshia aoba den liomedema aintsü ajungshi. Paisa, temesepba mozü achiba ajanga timtem atalokba indang jembia, aser kaketshirtem dang külem medemertem yongtsü nung temesepba mozü achiba metetra tsürapur mesüra ketdangsurtem nem metetdaksütsü ashi. Pai, tebilemstü meimshia ayuba ajanga timtem tuluba adoker ta shia, rijutemi ken o tamajungba kuma mao tsünga jenjang agütsü asoshi support system amenoktsü ayongzükba liasü.

Sharma-isa, college journal aser magazine sayatsü aser Nagaland University subject topper tem nem tetushi agütsü. College nungi topper tem rongnung Simon Konyak (BA Sociology, Rank 1), MenangnulaLongchari (B.Com, Rank 1), Yimjungbenla Ao (B.Com, Rank 2), T. TsarolaSangtam(B.Com, Rank 5), Nukshimeren (B.Com, Rank 8), Bothuka Achumi (BA Economics, Rank 2), Warela R. Yimchunger (BA Economics, Rank 3), Chichanrhoni Lotha (BA History, Rank 2), Alice Awomi (BA Political Science, Rank 2), Betimonyu Chang (BA Political Science, Rank 8), SentirenlaImson (BA Minor, Rank 2), aser Kekiewangsibe Hingleu (BA Minor, Rank 5) nunger densema liasü.

Fazl Ali College nung Stage Arrangement Workshop agi



Dimapur, Rongjui/September 6 (TYO): Eco Club, Creative Arts Club, aser Fine Arts Club of Fazl Ali College na senteper September 6 nü College nung Stage Arrangement Workshop ka ayongzükba agiogo. Iba sentong ya "Celebrating Nature with Creativity" omen nung ajemdaker agia liasü.

Sentong ya Dr. I. Narola Imchen lenisüba nung agi. Shisalen sayur Tutu Jamir aser Nunghijungla nati session balala agi, aser iba mapang sabang decoration ya naro metenba kija masü ta ashi. Tenati sabang design asüba mapang teamwork, sustainability aser environmental responsibility koda tongtibang iba indang lemsatep. Tongtibang onüktem rongnung background, lighting, furniture placement, omen aser sentsü den sound, light, aser screen setup atema electricity agütsütsüba amala

densema liasü.

Sentong nung shilem agirtem nem naro koda liomedema shitak metentsü iba yimya sayu. Shisalen sayurisa naro design indang tongtibang temetettsü pongu; line, color, form, space, aser texture indang tangazükba agütsü.

Workshop mapang foam folding, net cutting, floral tapes amshiyim aser naro metenba tasa balala sayu aser kaketshir aser tesayurtemia pei sabang decorate asüba nung shilem agia liasü.

Shisalen sayurtemisa naro tali metenba, tesangwa peria maliba aser kongki balala mesüra furniture tem agi decor nokdangba amala aibelentem tuteta ashi.

Iba sentong ayongzükba agiba ajanga sentong nung shilem agirtem kanga tajangzük kaogo, koba tarutsü asoshi tajangzük asütsü.



September 06, 2025 nü Jammu & Kashmir Chief Minister, Omar Abdullah-i Anantnag district nung tzümet süng agi kongshiba tesem ka semdangba mapang tangokba noksa nung angur.

PM Modi-i tzümet süng agi kongshiba state tem semdangtsü

New Delhi, September 06 (Agencies): Ato kilonser Narendra Modi-i tzümet süng agi kongshiba state tem semdanga tensa sadangtsü, ta ketdangsertemi metetdaksü. North tsütsü aliba state tem, talisa Punjab aser Jammu & Kashmir nung tzünglu maneni aruba ajanga tzümet süng lendong kanga bulua nisung jenti asüba den kiojen aika raksatsüogo. Himachal Pradesh aser Uttarakhand na nunga tzümet süng aser anentsüh lendong nung nisung aika süogo. Tawa Ato kilonser Modi Japan aser China na nungi meyipa aruba sülen pai Punjab Chief Minister Bhagwant Mann den jembia tzümet süng tensa osang metetpelaogo. Centre sorkari tzümet süng agi kongshiba state tem den

pezü süogo. Delhi nung aliba All India Institute of Medical Sciences (AIIMS)-i doctors aser team ka Punjab-i yokogo. Parnoki medical services agütsütsü. September 1 nü Union Home Minister Amit Shah-i Jammu semdanga Jammu Division nung tzümet süng aser anentsüh agi kongshiba tesemtem semdanga teraksatsüba jenjang asadangogo. Paisa Jammu kübok Mangu Chak yimdak tzümet süng agi kongshirtem ajuru. Amit Shah-isa Jammu nung Tawi Bridge, Shiv Temple aser tzümet süng agi kiojen raksatsüba tesem aika semdangogo. Jammu semdangba sülen Home Minister-i senden ka ayongzüka iba tensa asadangogo.

BRICS senden nung PM Modi melen EAM Jaishankar adentsü

New Delhi, Rongjui/September 06 (Agencies): September 08, 2025 nü Brazil Tir, Luiz Inacio Lula da Silva-i ayongzükb BRICS senden nung Ato kilonser Narendra Modi melen external affairs minister S Jaishankar adentsü. BRICS senden nung züngsem linüktem nungi lenirtemi US Tir Trump-i benokba saru atema jembiba den külemi linüktem tsüngda amalitepa inyaksü atema jembitsü, iba sülen külem sangdong ka metetdaksütsü. Hokolbarnü Ministry of external affairs (MEA)-i, online

ajanga ayongzükb senden nungji S Jaishankar adentsü, ta metetdaksüogo. Brazil-i, iba senden ya US anemba summit ka masütsü, ta shiogo saka Modi-i iba senden nung shilem magitsü lemtet. India-i Brics nung shilem agiba aija US secretary of commerce, Howard Lutnick-i, India-i dollar aser US pusemtsüla, mesüra saru shilem 50 agütsütsü renema alitsüla, ta shiogo. Tawa Tianjin nung ayongzükb SCO senden nung Ato kilonser Modi-i China Tir Xi Jinping aser Russia Tir Vladimir Putin na den senden mena

tesendaktep tajungba akümtsü atema jembiba ya Trump-i India dang saru shilem aika agiba agi lir, ta aikati bilemer. Ajisüaka MEA-i, India-i US den tesendaktepji tongtibang ama züngshir aser maneni linük ana tsüngda onüktem atema inyaksü aser linük ana tsüngda akhümtsübutepa tesendaktep tejakleni aotsü imlar, ta metetdaksü. US Tiri Brazil aser India na prongla dang saru shilem 50 agir. Brazil Atemabo iba ya shishilembaba tsütsülen nungi masü saka yimtenren tsütsü mangyangba lir.



September 06, 2025 Amritsar district kübok Ajnala nung ketdangsertemi rong nung mener tzümet süng agi kongshiba tesem asadangba mapang tangokba noksa nung angur.

यूको बैंक

UCO BANK

(भारत सरकार का उपक्रम)

(A Govt. of India Undertaking)

Branches, ATMs & Zonal Office indang

Electrical Audit agitsü atema Tender meshir

UCO Bank, Zonal Office, Jorhat kübok Branches, ATMs aser Zonal Office indang Electrical Audit agitsü atema degree/license tejangja alir electric engineers/auditors dang sealed envelope nung tender meshir. Tender documents den telatetbater tejangjaji onok indang Zonal Office aser Bank indang website www.ucobank.com nung angutsü. Tender ji October 3, 2025 nü nikongdang 3:00 ako tashi nung UCO Bank, Zonal Office, T N Sarmah Path, Nehru Park, Jorhat- 785001 nem agütsütsüla.

Zonal Head

Himachal nung tzünglu dak sendakba lendong nung nisung 360 süogo

Shimla, September 06 (Agencies): Himachal Pradesh nung tzünglu dak sendakba lendong maneni atalokdar; tzüngluruwa mongpu tenzükb sülen state nung tzünglu dak sendakba lendong nung nisung 360 süogo. Nisung 197 tzünglu dak sendakba lendong balala nung asü aser nisung 163 mongpu dak sendakba gari lendong nung asü, ta State Disaster Management Authority (SDMA)-i metetdaksü. SDMA-i, tzümet süng aser anentsüh ajanga national highways asem (NH-03, NH-305 aser NH-505) densema gari lenmang 1001 mokdanga lir, distribution transformers (DTRs) 1992 raksago aser tzü supply schemes 472 raksago, ta metetdaksü. Testüba ghonda 24 dak tali tzünglu kanga aruba ajanga districts aika nung gari lenmang ano aika mokdangogo; Kullu nung gari lenmang 225, Mandi nung 205, Shimla nung 212 aser Chamba nung gari lenmang 166 mokdangogo. Kullu nung DTR 867 raksago, Shimla nung 454 aser Mandi nung 308 raksago. Shimla nung tzü supply schemes 226, Mandi nung 78 aser Kullu nung 63 raksago. SDMA-isa, tzünglu maneni aruba ajanga kanga tezülen aliba tesemtem aser tenemlen aliba tesemtem, talisa Kinnaur, Lahaul-Spiti aser upper Shimla nung teraksatsübatem yanglushiba maparen nung tetsükdaksü ajurur, ta metetdaksü. Lossar aser Batal na tsüngda National Highway 505 nung anentsüh tulu aluba ajanga lenmang mokdanga lir. Kullu aser Mandi na nunga mapang shia lenmang mokdangar. Ketdangsertemi nüburtem dang kanga kümdanga alitsü aser nüngdak tulu melira ainlen mesenzütsü tekümdangtsü metetdaksüogo. Public Works Department, Himachal Pradesh State Electricity Board aser Jal Shakti Department-i teraksatsüba balala methitemi yangludar.

Census nung Sentinelese nunger nütsüng-a züngoktsü



Andaman Islands nung aliba Sentinelese nungertem noksa nung angur.

New Delhi, September 06 (Agencies): Union Territory of Andaman & Nicobar Islands-i Census 2027 agitsü atema maparen tenzüka ketdangsertemi Sentinelese nunger nütsünga koma züngdangtsü, iba atemaji o lempet tenzükogo. Sentinelese nungertem ya alima nung pre-Neolithic tribes tatembangbuba lir, aser tanü tashi meimchirtem shingaia parnok den tongtepratep masür aser parnok aliba asetkong jagi aotsü memelar. Ministry of Tribal Affairs-i ashiba agi, Sentinelese nunger nütsüng züngdangtsü atema "non-invasive thermal census" agitsüa akok. "Sentinelese kin ya North Sentinel Island nung alir, aser parnok ya tesüiba küm meyrjang aika tanünga limai sendoka lir. Joko Census tenzüksü, anungji onoki Sentinelese nunger nütsüng züngdangtsü atema lenmang balala bushidar. Kaji- thermal Census agitsü akok. Tang tashi nungbo onoki tatembangbuba telemtetba magi, saka kobi melii telemtetba agitsü," ta sorkar ketdangser kati metetdaksü. Protection of Aboriginal Tribes (Regulation) Act, 1956 aser Indian Forest Act, 1927 kübok aliba ozüng kar nung ajemdaker North Sentinel Island aser temeket tesemtemji wazüka ayur, aser iba asetkong jagi aotsü memelar. Sentinelese nungertem ya Scheduled Tribe (ST) ama züngshir. Iba asetkong jagi aotsü merangertem aika parnoki lasang agi khasetogo. India sorkaria parnoki aginüba ama parnok odang yutsütsü telemtetba agia lir. Sentinelese nungertem ya Andaman Islands nung tesüiba küm 55,000 dak tali alir aser parnok ya Africa nungi mezüng jakzükb meimchirtem asütsüa akok ta bilemer. 2018 küm November ita nung America nunger, John Allen Chau-i iba asetkong jagi oa Khrista osangtajung lemsateptsü meranga liasü, saka yangji aliba Sentinelese nungertemi pa lasang agi khasetba sülen alima tesem ajaklen iba osangji prokshia liasü.



TIR YIMYIM YIMOBILEM (EDITORIAL)

DIMAPUR SUNDAY, SEPTEMBER (RONGJUI) 07, 2025

Ajemalurtem

Alima tsütsü bilemdangbo ajemalurtemji tebur saka lapi, anungji yimten aser lokti nung tagidak makaba purtem amai asenoki bilemer. Ajisüaka, Yisuiبو ajemalurtemiang alima senmang amangtsü ta Mathi 5:5 nung shia lir. Aji oda, Yisui bilemba o asenoki bilemba naji amsa-am itta lir. Asenokibo alima senmangji terakzür meyong ta bilemer saka Yisui ashir, alima senmangji tashiyim amshia aseni aginüba rakzüka amangba agi mamangtetsü. Aji oda, Yisu tsüngdang ajemalurtemji alima tsütsü lapilarartemji masü mesüra tashimait aser tasümaitertemjia masü. Yisui ashiba ajemalusangji arem shiti mesük, paji tashi kanga tait aser tasüa tait, pai kecha metsübur, ajisüaka kodang nisungtemi paji pua bener arua azüoker, nisung meyerijangia makoktsüba tashi aser tasü tait shiti to pa pua abener arua azüoksang kibur tsüngdang kanga ajemalua akümer. Iba shiti to kasa arem shiti, tesashi aser tetsübuttsü mit aketba shiruru, ajisüaka kiburi azüok nungji kiburi ashi anga ajemalua alir. Iba kasaji, ken mapang kabo asenoka nisung tesü, tamajung aser samaro, ajaki tsübu repringba nisung ser alitsüa akok, saka kodang Yisui asenok apu aser tanüla temeshi nem asenok azüokdaksü, asenok taküm to akhi memesük tesangwa, taremsük, kumli tajung aser tejungnü nisung akümer. Akhidang, kecha masü nung ain adoka tangar yiruja aliba nisung to tangbo tangar ain adokdang madoker, tangar jashidang mejashir, kümli tasü kümer Tsüngremi mulungba nung dang jajar, kechiyong Tsüngremji dang pa taküm nung kibur ta pai angateta lir aser iba kibursang tashi jagi pa azüoka lir. Aji oda, ajemaluba tetezü asenoki asen temeten bushia tangar den metokteper saka Tsüngrem nem dang toktsür. Ajemaluba tetezü tanüla temeshi nem dang asen taküm aser mapa ajak bendanga agütsür. Aji oda, ajemaluba tetezüji talangka aremsükba aser asen mulung masü saka kibur mulung südaktsüba taküm yimya aser jakliro lir. Mosa kanga ajemaluba nisung liasü. Aji oda, Israel nunger amang agi sangwa küma arem aser lisem lima ajanga anir aruba Mosa dangji asenoki lapi ajatsü asü. Mesüra, ain adoker ozüng longpak jaksaa endokba nisungji lapi asü ? Nisung tsütsü paji teburghi aser samaro. Ajisüaka, Tsüngremi azüokba agi ajemalu nisung aküm. Aji oda, Yirusalem tenla ki menenja shishilembartem aser sen melenertem mena aliba menden meküpkokja aina adoksang Yisu Khrista dangji asenoki lapi ta ajatsü asü ? Pai pa arishir dang kecha mashi. Kangki nung angenloktsüba mapanga Pai kotak nungi kotak tenyar meyi aika jakzüker Yihuda nungertem to ajak pua yuteta liasü, saka Pai aremsük, kechiyong yamaji inyaktsüba tebu memulung. Aji oda, Yisui ajemalua Yihuda nungertem nem kangki nung agenloktsüba ajanga Pa tashi tuluba nung shia aru. Iba jagi tanü asenoki Pa külemer. Pai alima aser kotak senmang amangtsüsa ajemalua pa taküm bendanga agütsü. Tanü asenok akümlirtem dang ajemalua lira, alima senmang amangtsü ta shia yutsüba Tsüngrem o ji tiyazü masü. Nai tendanga tangar dang aremsükdangang, o tamajung tejembi, mapa tamajung teinyak, Tsüngremi mulungba bushiang aser aji inyakang. Atangji, alima nung ali senmang ajakji angutsü. Mathi 5:5 nung nangzüka senmang yabo ali shi taküm ya süitemer amangtsüba kotak senmang indang ashiba masü, saka tang akümüli nung amangtsüba ali rongsen indang ashir. Na teburghi aser samaro ta Tsüngremi meteta lir. Na tesangra, shisataka aser tasütait tetsür ta Tsüngremi meteta lir. Ajisüaka, Laishibai ashir, alima nung ali senmang amangtsüsa takar akümütsüba ya tasü aitba agi masü mesüra shisa akaba agia masü, saka ajemaluba agidang amangtsü. Tetezü, ajemaluba ya rongsen aruba lenmang aser iba lenmang nungi anguba rongsenjibo asen senmang asütsü. Ajisüaka, tekümdangtsü kaji samaro mapa inyakba agi mesüra asenok shisa akaba kija agi anguba rongsentemjibo asen senmang masütsü. Ibaji aseni ngua samatsü. Alima senmang amangnura, Laishibai ashir, AJEMALUANG.

OLEMSABANG

TAMANG NUNG AINBA

~ Mrs. Amenla Amlari (Source : Otongdar)

Tanü asen aliba alima ya repringdangra ajaklen terenlok ka-a ainba asenoki angur, tatishitsü agi shishilempaba tsütsü repringdangra osettsüset ajak nung jenjang ajungketogo, education bushiba nung joko school aser college zünger mezüngma renlokba den fees-a kanga ajungketba angur. Tetamatsükaji lenmang nung joko gari mesemi renlokogo aser technology tsütsüjibo jembitsüang mali, joko phone amshi mashir mali. Tila tanuri-a smart phone amshiteter. Oda asen lima ya balaka nung kera-a ainba asen nük agi angur. Arishiaka memenepi ainba putu ka nung, alima aser putu denji meneptepa tamanger ka tamang jenjang nungjia aintsüji kanga dang tongtipang, aser Khristai-a anogoshia tamang nung aintsü tamanger tamanger shia nungi akanger.

Mapang ka Pablo Casals ta sür cellist (kongki tapu ka atemer) liasü. Pa küm 95 tain liasü, par putu nung kongki kanga junga temteter rongnung pa ya ka liasü. Kenü anogo pa dang young reporter kati asüngdang, Nai kongki kanga junga temteter nung kechiba nai tang tashi practice asür? Idangji pai menürema langzü, "Because I think I am making a progress".

Terenlok asoshi mesüra "aintsu" asoshi mapang aser küm tataktet ka mali, saka tasonünungi leper-i mai tashi terenlok ka-a aintsu asoshi Tsüngremi meimchir ya yanglu.

Tsüngremi alima aser yangji aliba kechisarena yanglu, aser teyangluba ajak süngdong, shiruru, meimchir, etc. ajakji renloka ainer. Anungji "Ainba" ya tang tasen puratetba mapa ka masü, saka teyangludang yongi asenokji iba inloka aintsü yanglu. Tatishitsü agikodang kinü tanur ka sodir, aso nü nungi aintsü tenzüker, kodang kinüji meinloklir, pa/la dak timtem ka lir ta doctor bushiteper, mesüra süngdonglidonga meinlokra anepaludanger aser anosa meinra lepdokadoker, kechiaser meimchir taküm süaka, sungdongji süaka aintsü asoshi yanglu. Yamaji tamanger ka kodang Khrista nung sodir,tebensa kecha meli ajak tanela nung aser tamang nung leperi mai tashi aintsü nüngdaker. Joko nibo peria inoko or joko onokbo amanger talangkaji periogo ta khristan taküm ka asoshi mali. Kodang asenoki yamaji bilemdir atsüngtena (stagnant) aliba tamanger ka akümütsü aser tanemi Tsüngrem nungi pila-a oadoktsü, aji agi II Peter 1:18 aser Efesa 4:14 ff nungji khristan ka tanen makai aintsü indang shia angutsü. Tamang nung aintsü asoshi lenmang aika dang lir, saka tongtipang ta bilemba kar tongmelang agi lemsateper.

1. Tanela Chiyongtsü Chiyongtsüla: Tsüngrem Oji tanela chiyongtsü lir. taküm ka aintsüasoshi koda chiyongtsü chia-ajemer yamaji tamang nung aintsü asoshi kenüa mati tanela chiyongtsü jagi tanelaji mesütsüla. (I Peter 2:2, Ibri 5:12-14). Kodang tamangertemi Tsüngrem O ji taküm nung shilem ka kümdakja azüngba, bushiba, angashiba aser inyakba nungji nendaka lidir tamang nung aintsü tenzüksü, taküm tasen poktetsü (1 Pet 1:23) aser iba yagi taküm kaji melenshidaktsütsü, merüktetdaktsütsü, sangwatsütsü aser anogoshia len mejemi-i temeshiba nung aintsü. (T.Ken 119:105) Immanuel Kant-i ashi "Tsüngrem Oji meimchir asoshi temoatsü tulutiba" ano St. Ambrose-i ashi, "Temeshi laishibaji shisatsü benjung chiyungtsü aser kaket shiaji chiyungtsü tapubalala" (Holy scripture is the feast of wisdom and the single books are the various dishes), anungji nai tamang nung inloknera, anogoshia Tsüngrem O jagi tanelaji mesütsüla.

2. Mopung Tajung Peria Agitsüla: Taküm alitsü asoshi mopung ya kanga tongtipang mopung tajung (Oxygen) melira taküm melitet. Hospital nung tangu (breath) asoshi sen agütsür aser taküm tatsüka atema süaka sota ayutsü merangteper. Khristan taküm ka tamang nung aintsü asoshi tangulaji (breath) kanga tongtipang lir. Tanela taküm asoshi tangulaji "Sarasadem" ya lir. Nüngtogo sayutsüngir Spurgeon-i ashi "Sarasademji tangula...tashi aser khristantem asoshi akhüm". Tamanger ka taküm nung sarasademji melira tamangji tasü ta angatetsüla, aji agi I Tesalonika 5:17 nung "maneni sarasademang" ta tenyar Pauli ashiba angutsü. F.B. Meyer-i ashi, "Taküm nung lendong tulutibaji sarasadem melangzüba masü, saka sarasadem masübaji lir". Ano M.E. Andross-i ashiba ka, "Sarasadem dak alaka" taküm nung tongtipangtiba wadang kecha mali, kechiaser tanga wadang takok ajakji sarasadem dakji metaloka lir. Tamang nung taküm lia aintsü asoshi sarasadem-ji kanga taongtipang, sarasadem jagi dang tamangji taküm lidaktsür.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Nigeria nung missionary tantsütila, Ruth Elton alima nungi pilaogo



Ruth Elton aser lar missionary tsürabur Rev. Sydney aser Hannah Elton den tangokba noksa nung angur

September 06, 2025: Nigeria nung missionary tantsütila, Ruth Elton alima nungi pilaogo; la arrshi küm 90 liasü.

British tsür missionary Ruth-i la arrshi piyong Nigeria nung missionary inyaka Arogo tasen aika tenzüksüba den külemi küm 70 dak tali Khrista osangtajung sangdonga aruogo.

Ruth Elton den külemi inyaker pastor tem rongnung ka, Ojueromi Omotayo-i, la Nigeria nung Osun state kübok kübok Ilesha jila nung lia August 30, 2025 nü süogo, ta metetdaksü.

Elton ya arrshi küm 4 asüdangyongi 1937 küm missionary lar tsürabur missionary Rev. Sydney aser Hannah Elton na den külemi Nigeria-i arua liasü.

Elton arrshia ali asübo September 7, 2025 nü arrshi küm 91 abensatsü liasü. Rev. Sydney aser Hannah na tanur Ruth Elton dang sosem. Anungji Ruth Elton-ia lar tsüraburtem tsüingsü nung jaja Tsüngrem tenzükba wadang nung nokdak.

Lai Nigeria nung sayutetba lenirtem aika evangelical sayutsüngirtem aser pastor tem kümogo. Nigeria nung sayutsüngirtem aser pastor temi la ya Nigeria nung missionary inyaker tem rongnung tantsütila, ta züngshia liasü.

Lai la arrshi piyong Nigeria kübok Kogi, Ondo, Oyo aser Osun state tem aser linük central aser anüolen tip tsütsü talisa yimtsüngtem nung tenzuka aruogo. Lai Nigeria nung oshi ana- Ebira aser Yoruba kanga junga angazüka jembitet, aser ibaji ajanga Tsüngrem tenzükba wadang nung lai takok angu.

Talisa lai Tsüngrem yimli, tatok meshiba aser temeshi taküm alitsü atema sayua liasü. Lai Khristantem dang alima nung aliba rongsen masü saka kodak nung aliba rongsen nung ang rangloksü ajungshia liasü.

Ruth Elton-i Ebria lisopur evangelical Arogo tuluba den- a inyak, ajisüaka lai temaba mendenbo Ebira nung nem agütsü.

Lai sayutsüngiba dak alia yimtsüngtem nungbo health care services-a agütsü, aser ibaji ajanga kinü asüdang tanur süadokba kanga ajema aküm. Nigeria yimtsüngtem nung chiyungtsü agi matuba den merükmeju maliba agi kinü tanur kanga bulua asü, anungji lai tetsütem dang merükmejua alitsü sayu, tanurtem nem chiyungtsü tajungtiba agütsütsü ajungshi aser tanur anepalubaren sayua liasü.

ANOGO ABEN TSÜNGREM DEN

AMMANG MAPATEM TOKTSÜDI

"Ammang talangka sütogo, sangwatsü mapang anasa lir. Anungji asenoki ammag mapatem toktsüdi aser tesangwa raraba nok-onü sobudi." Rom 13:12

Lipok dang Tsüngremi ammag aser tesangwa, aonung aser anüngdang bentet-benteta yanglua toktsü. Nisung asoshi ammag aonungji anisüngzüksü aser anüngdang tesangwaji mapa inyaka alitsü yamaji Tsüngremi yanglu. Ajungben, aritep mapa ka mesüra ammag mapa kodanga tajung masür aser aji anüngdang tesangwa nung ang ajitetter.

Temeim adianutem, asenok tamangertem nisung shiai pei takümji ken meyipa reprangdi kechiyong aseni inyaka aruba mapatemji aika ammag nung inyakba mapa ama alitsü. Asenok aika ammag temenen mapa nung ammag piyong aruogo, joko an kongpang nung lir. Yimdangi arutsü mapang tongogo, kechiyong yakta Kibuba anogo tesangwa jagi meneptsü asen mapa ajak jungkai adoktsü.

Asenoki aonung tammang dak amshiba torch light ya ammag tanakji koka tesangwa agütsütsü yangluba oset ka lir. Saka tanü alima tashi temetet shisatsü tulu liaka anüngdang tesangwa mangdaksüba oset kecha yangluteta mali. Iba jagi sayur tesangwaji tammang dang nungi tashi tuluba. Ammagji teti asoshi meyanglu, ammag mapa inyaka lia tesangwa ajurutsüji tetsübutsü asütsü. Tesangwa sobutsüji sobur temenen den raraba tongpang nungji nokdakdi ta ayongzüker.

Pakistan nung Khristantemi akhangba ketdangsertemi agizükogo

Lahore, September 06 (Agencies): 2023 küm August ita nung Pakistan nung Islam yimsü alia amangertemi Khristantem amakba sülen küm ana ajungba mapang nung Khristantemi ochi temeden meshia anogo 17 tashi longkak aita aruba sülen Mongolbarnü (September 2) tembangogo.

Khristantemi akhangba ama sorkari inyaksü, ta nangzükba sülen Khristantemi mener longkak aitba anen.

Longkak aitertem den jembidang Victims Committee of Jaranwala convenor, Lala Robin Daniel-i, Khristantemi mener pei temeden atema mapang talangka longkak aitba ya Pakistan puti otsü nung tang mezüngbuba lir, ta ashi.

"Tesüiba küm ishika tsüingda loktii Khristantem amakba tatalokba 13 lir, ajisüaka Khristantemi kodanga ochi temeden atema ola amadok," ta pai metetdaksü.

2023 küm August 16 nü Pakistan nung Punjab province kübok Jaranwala nung Khristantem amakba dak sendakba nung pai, "Iba linük puti otsü nung tang mezüng kilometer 10 telongtet nung Khristantemi lenmangtem nung dang masü saka leper aser Tenla kitem nunga longkak aitogo," ta metetdaksü.

Pakistan nung Khristantemi mener longkak aitba ya tang mezüng lir, iba dak alia lumia longkak aitba nungji tetsürtemia shilem agia liasü.

Daniel-i, Jaranwala nung Khristantemi longkak aittsüsa aküm, kechiyong parnoki ochi temeden atema ayimdenba aser takoksa angurtem nem temenok agüjang ta akhangba ola ketdangsertemi mangashi, ta ashi.

"Onoki onok sasa telemtetba agia inyaksüsa aküm, kechiyong onok atema jembirtsürtem, ta ashirtemi Lahore aser Faisalabad nung aliba five-star hotels nung senden amenba dak alaka chichiba kulibo memetet," ta pai ashi.

Parnoki takoksa angurtem ki semdanga temenok ngur mangu mesüra ken o koma odar ta masüngdang, ta pai ashi.

"Suit aser putir süoshi asemertemi sorkar ketdangsertem den senden amenba dak alaka atangji nungbo onok atema kecha meinyaksü. Ibaji ajanga sorkari süoki ia mangir," ta Daniel-i

Longkak aitertem den jembidang tetsür kati, sorkari aibelenertem anema meinyakba atema Jaranwala nung Khristantem jashir, ta ashi.

Laisa, onoki ochi temeden mangu tashi onok mesüngjemtsü, ta sorkari angatettsüla, ta ashi.

Victims Committee Jaranwala aser Minority Rights Movement Pakistan-i ayongzüka August 16 nungi Jaranwala nung aliba Christian Colony nung longkak ait tenzükba sülen September 2 nü longkak aitba anenogo.

2023 küm tebur anati Muslim nung temeshi kaket raksatsü, ta tai tongloksüba nungi Muslim nung lokti tulu kati Jaranwala nung Khristantem anema apusodang Tenla ki 25 aser Khristan ki 85 rongdokja liasü.

"Mezüng anogo nungi onoki, sorkari onok den indangindanga inyaksangshitsüla, ta takhangba agütsür," ta paisa metetdaksü.

"Onok Faisalabad-i jaoka liasü aser yangji federal sorkar nungi parnok tenet-ti shi liasü. Parnoki onok dang, nenok takhangbaji sorkari metetogo aser telangzübaji nenoki angutsü ta ashi. Parnoki onok dang longkak aitba anenang taka mashi," ta pai metetdaksü.

Ajisüaka committee-i sorkar tenangzükba nungji ajemdaker longkak aitba anentsü atema telemtetba agi, kechiyong linük nung tziümsüng lendong lir, ta pai ashi.

"Ajisüaka sorkari nangzükba amaji meinyakra onoki asentenshir longkak tesashiba aittsü," ta paisa metetdaksü.

AO OSHI ANGAZÜKDAK:**TANÜ ANGAZÜKTSÜBA OJANG****Tetsü**

(n) tetsür, ojala, par meyong oja (female, mother, his, her mother)

* Tetsü tajung kati tanur tajung kümdaktsür.

Tetsü

(n) teret maden shi dang (flesh, boneless)

* Nashi shi tetsü jenjang kanga saka kümogo.



Tir Yimym

OLONG PAITEP # 7263

1		2		3		4	5			
				6						7
		8								
9				10		11				
			12					13		
						14				
16						17				

TIPIEN

1. Nisung jenti
4. Tsük rudenba
6. Temzüng tesashi
8. S___i
9. Nisung rongnung telemsa
10. Anogoshi
12. Ajanga aor
13. Tsük rizüngdak
14. Tebang nungi adokba
16. Süngdong tatembangtiba
17. Meputep

- (5)

- (5)

- (5)

- (3)

- (3)

- (4)

- (4)

- (3)

- (3)

- (5)

- (5)

LANGTSÜNGLEN

1. Tenük telong
2. Committee dang ajar
3. Yagi ki okdoker
5. Yim lenmang
7. Temoatsü keter meyipa aruba
11. Kanga junga menemba
12. Kenyongi majinü
13. Rong kanga tulu

- (9)

- (5)

- (7)

- (5)

- (9)

- (7)

- (5)


- (5)

OLONG PAITEP # 7262 TELANGZÜBA**TIPIEN :**

2. Tsükten, 4. Asüng, 5. Taku,
7. Atalok, 10. Lempet, 13. Apir,
14. Lanur, 15. Tenütsü.

LANGTSÜNGLEN :

1. Atala, 2. Tzüla, 3. Apuso,
5. Tenem, 8. Lajar, 9. Opang,
11. Penzü, 12. Tarak

NAI-A YA METETTER MA

Japan nung telok kati fiber optics nung alima otsü tasen ka yangluogo aser ibaji second ka nung data speed 1.02 petabits (1,123 miles) atongba lir. Iba telok yagi optical fiber tasen ka amshia iba otsü yanglu aser 1.86 exabits per second per mile atongtsü akok. Japan nung National Institute of Information and Communications Technology (NICT) nung lead researcher Hideaki Furukawa-i anir teloki iba mapa inyaktetogo. Iba ya U.S. median fixed broadband download speed (285 Mbps) dang nungi million pezü agi tekaraba lir.

Tanur asoba anogo nung salem osang den noksa angati adokdaksünura - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimym bureau tem nung agüjang.

PM Modi-i Manipur semdangdang sentong 2 nung adentsü

Guwahati, September 6, 2025 (Agencies): Prime Minister Narendra Modi-i September 13, 2025 nü Manipur semdangtsü sentong lir aser iba mapang lokti sentong tulu ana nung adentsü.

PM Modi-i iba sentong methitemra May 2023 nung Manipur nung kin o kin tsüngda rara adokba sülen mezüng semdang asütsü.

Churachandpur nung ketdangsürtemi Peace Ground nung nisung 9,000 adentsü atema sentong renemer. Iba tesem nung PM Modi-i o jembitsü aser internally displaced persons (IDPs) den

ajurutepa sensaksemtsü.

Churachandpur district administration-i security akangshitsü atema "no drone zone" ta metetdaksüogo.

Prime Minister-i semdangi arudang civil society organization balalai memorandums agütsütsü tebilemba lir ta social activist Thangminlun-i ashi.

Kasa anogo nungsa Modi-i Imphal tonga aotsü aser Kangla Fort nung sentong ka nung adentsü.

Iba tesem nung nisung 15,000 shi adentsü atema ketdangsürtemi sentong renemdar.

PM Modi-i semdangtsü aliba atema Imphal International Airport aser Kangla campus tobur jungdaksüba mapatem inyakdar.

PM Modi-i Manipur semdangbaji official lir saka party züngsemtemi pa pelaa agizüksü sentong tulu ka renemdar aser Kangla rally nung nisung aika dendaktsütsü ta BJP spokesperson Robin Blackie-i ashi.

Churachandpur aser Imphal nung ketdangsürtemi maparen inyakaka tang tashi Prime Minister arutsüba osang tejangja kecha mesangdong lir.

Assam Governor-i tesayur tambusang den ajurutep

Jorhat, September 6, 2025 (Agencies): Assam Governor Lakshman Prasad Acharya-i Hokolbarnü Assam nung tesayur tem rongnung tambutisang nem tenüngsang agütsüogo.

Teachers' Day tenüng nung Governor-i Jorhat nung primary school tesayur arishi küm 94 tain Rajat Chandra Goswami den

ajurutepa tenüngsang agütsü/ Iba ya 'Assam Governor Varishtha Shikshak Samman' nung shilem ka lir. Iba mapatong

kübok district commissioner tem dang pei pei district nung taküm aliba primary school teacher tambutisang nem

tetushi agütsütsü metetdaksüogo.

Goswami-i pa taküm piyong district aser state asoshi shisaluyimba nung shilem tulu agiogo ta Governor Acharya-i ashi.

"Tesayurtemi bendanga agütsüba aser tenangzüik tajung yur inyakba ajanga linük renloker. Linük senmang aser sobaliba nung tesayurtem nem akhümtsüba agütsüba ya tongtipang shilem ka lir" ta paisa ashi.

Iba sülen Governor Acharya-i Kakojan nung Ali Chuburi Model Anganwadi Centre semdang aser idakji

kaketshirtem, tesayurtem aser tsuraburtem den ajurutepa sensaksem.

Paisa Anganwadi centre nung inyaktertem dang lipoküm merüka ayutsü aser süngdonglidong tsünütsü ayongzüik.

'Gaon Mein Governor' mapatong nung shilem ka ama Governor Acharya-isa Holongparara nung Amrit Sarovar semdang.

Idakji pai self-help groups züngsemtem den ajurutep aser parnok dang sorkar programmes aser schemes tajungtiba nung inyaktsü ayongzüik.

CM Sangma-i Amit Shah dang special AIS cadre meshi

Shillong, September 6, 2025 (Agencies): Meghalaya Chief Minister Conrad Sangma-i Union Home Minister Amit Shah den ajurutepa state ketdangsübaren aser sobaliba maitsü dak kongshiba tebilemtsütem lemsatepogo.

CM Conrad-i Amit Shah dang Meghalaya atema All India Services (AIS) cadre balaka tentettsü rongshiogo. Tanga ya Assam-Meghalaya cadre külem lir.

Meghalaya atema cadre balaka tentetba ajanga ketdangsürtemi ketdangsübaren nung dang temulung agütsütsü

aser iba ajanga mapa tajungba inyaka otettsü ta Conrad-i ashi.

Centre-i Khasi aser Garo oshitem Constitution nung Eighth Schedule nung enoksemtsü ayongzüiker ta paisa Amit Shah dang ashi.

Meghalaya Assembly-i iba atema bangzüng ka renema lir aser ibaji pusema aiben shiditem zülüogo. Khasi aser Garo oshitem agizükba ajanga state sobaliba senmang wazüka ayutsü ta paisa ashi.

Iba senden nung onük tongtipang ka benoka jembibaji Meghalaya nung Inner Line Permit (ILP) system indang

liasü.

CM Conrad-i ozüing alema arurtem tebilemtsü lemsatep aser ILP ajanga state kümzüka ayutsü ta ashi.

CM Conrad-isa New Delhi nung asür Purno Agitok Sangma nüngtem nung gari lenmang ka tenüng jaloktsütsü tebilemba lemsatep.

PA Sangma ya taoba Lok Sabha Speaker aser northeast nungi tongtipang lennir ka liasü. Pai lisopurtem, nübo agi tangar memenepertem aser Northeast nunger temeten atema noktak ta Conrad-i tebu indang otsü lemsatep.



Guwahati: Karimganj nungja Sribhumi agi melentsüba atema Honibarnü Sribhumi nung nüburtemi longkak aita liasü. Longkak aiba tesem tongtibaji Badarpur nung N.C. College liasü. Kaketshirtem aser iba tesem nung alirtemi National Highway 6 nung gari senzüsenpong nung tetsüdaktsü adokdaksü aser ketdangsürtem den mangatettep adoka liasü. Longkak aitiba sülen mejangjaba lokti tentet kati iba tesem ghonda 12 atema mokdanga liasü.

Israel military-i Gaza City nung alirtem dang yimti toktsütsü mepeshi

Tel Aviv, Rongjui/September 6 (Agencies): Israel military-i Honibarnü Gaza City nung aliba Palestine nungertem linük south leni aotsüla ta shiogo. Israel nung sepaitemi Gaza strip nung yimti tulutiba atsüngtsü merangba mapang iba tetuyuba agütsüogo.

Israel Ato Kilonser Benjamin Netanyahu-i military dang Gaza City atsüngtsü atema tetuyuba agütsüba sülen Israel nung sepaitemi iba yimti indang suburb tem joko hopta aika maka arudar.

Netanyahu-i ashiba agi, Gaza City ya Hamas pur tamendakdak tongtibang ka lir, aser iba Palestine nung Islamist militant tem ya akoktsü atema iba yimti ya atsüngtsü nüngdaker, shirnki 2023 küm October ita Israel amakba

ajanga iba rara tenzuka liasü.

Israel nung sepaitemi iba yimti amakba janga yimti nung jenoka aliba Palestine nung noklang aika prokshia yoktsü ana nung lir. Rara metenzük tsüngda iba yimti nung nisung million tesadang ka lia liasü, koba Gaza indang nütsünyongsük tesadang shi liasü.

Israeli military otongdar Avichay Adraee-i X ajang ashiba agi, iba yimti nung alirtem southern Gaza kübok Khan Younis-i aotsüla. Iba tesemi jena aoertem nem chiyongtsü, tejenokdak aser medical teyari agütsütsü, ta tenangzükba agütsü.

Adraee-i ashiba agi, iba tesem ya "humanitarian zone" ka lir.

Brehostibarnü military-i ashiba agi parnoki yimti

tesanda shibo azüokatokogo. Parnokisa, parnoki Gaza shilem 75 shibo azüokatokogo, ta ashi.

Rara tenzükba mapang Gaza yimti nung alirtem aika pei talidak ki toktsür jenshia ao saka meyipa ogo. Yimti nung alir kari ashiba agi, parnok tanaben yimti toktsür jena maotsü.

Israel military-i iba yimti ya joko hopta aika makdar aser iba hoptabo sepaitem yimti teyong atongtsü kilometer ishika dang anunga lir.

Israel military lenirtemi iba yimti mamaktsü atema shiaka right-wing coalition allies temi teyari agüja Netanyahu-i, Gaza City atsüngtsü tetuyuba agüja liasü. Military-i iba yimti amaktsü arendakaka parnoki iba inyakyim nongita yaritsü atema reserve nung yua aliba sepaitem meyrejang aija jaoka liasü.

OFFICE OF THE
LONGSA CITIZEN CLUB

MKG. 798601, NAGALAND

TENÜNGSANG AGÜTSÜR

Mr. Moanungsang Jamir, S/o T. Chuba Jamir, Secretariat Assistant inyaka lia ano jenjang tuluba nung 2024 NPSC ajanga agiba tatidang nung Block Development Officer (Class-I Gazetted) under Development Department mapa tajung takok anguba atema asen Longsa Citizen Club-i tenüngsang agütsür.

Yamaji ne mapa tajung ajanga ano alima nübur asoshi tajungtiba inyaktsü Tsüngremi ne wadang takok nung moaja len aniang ta sarasademtsür.

Sd/-
Arensosang
Tir, LCC

Sd/-
Temjenyongla
Tongti Zülur, LCC

AO OFFICERS' TELUNGJEM SENDEN

Omen : "Kü Lima, Kü Khu"

Anogo: Rongjui 13, 2025, Mapang: 10:00 Ako

Tesentepdak : Town Hall, Mokokchung.

MEZÜNG SENTONG

1. Menden okila aser tarur pela-a agizükba
2. Sarasademtsü : **Rev. Ponon Longchar, Sr. Pastor, MTBA.**
3. Tenüngsang agütsüba: : **Wt. Asangla Imti, IAS, Secretary, GoN.**
4. Tayongzükba O : **Wb. Sentianger Imchen, IAS, Chief Secy., GoN.**
5. Tepela O : i. **Wt. Tianaro Jamir, President, Watsü Mungdang.**
ii. **Wb. Asangba Chuba Ao, IAS, Joint. Secy., Ministry of Civil Aviation, Govt. of India.**
6. Temeja ken : **Ao Students, Clark Theological College, Aolijen.**
7. Aor akümdong ola : **Wb. Marsanen Imsong, Tir, Ao Senden.**
8. Kü lima, kü khu : **Dr. Sentitula, IFS, DFO, Mokokchung.**
9. Aor officers asoshi mejeta sarasademtsü : **Rev. Temsü Jamir, Exec. Secretary, ABAM.**
10. Tajungshi O (Aor legislators ajak tenüng nung) : **Wb. Sharingain Longkümer, Hon'ble Speaker, Nagaland Legislative Assembly.**
11. Melepzüng O : **Wb. I. Anungba Sanglir, Additional Director, F&CS, GoN. aser Sentongtonger luden züngsem.**
12. Tatem sarasadem : **Wt. T. Arenla Longkümer, Secy., ABAM Women Ministry.**

MENDENPURTEM

KOHIMA AO OFFICERTEM TELONGJEM (KAOT)

1. Tir: **Wb. Limasunep Jamir, IPS, Special Secy. (Home).**
2. Tatong Tir: **Dr. Kikameren Longkümer, Joint Dir., H&F Welfare.**
3. Tongti Zülur: **Wb. Rongsenlemzüng, Project. Dir., Soil & Water Cons.**
4. Repsem Zülur: **Wb. I. Tongpanglong, Deputy Secy., Cabinet Cell.**

MOKOKCHUNG AO OFFICERS TELONGJEM (MAOT)

1. Tir: **Wb. I. Lipokonen Jamir, Joint Dir., Agriculture.**
2. Tatong Tir: **Wb. Chubatoshi, Exec. Engineer, PWD (R&B).**
3. Tongti Zülur: **Dr. Sentitula, IFS, DFO, Mokokchung.**
4. Repsem Zülur: **Wt. Yashikala Jamir, Asst. Prof., Fazl Ali College.**

DIMAPUR ZONE AO OFFICERS TELONGJEM (DZAOT)

1. Tir: **Wb. Imosong Imsong, Joint Commr, Taxes Dept.**
2. Tatong Tir: **Wb. R. Atsung Tzüdir, Joint Dir., Eco. & Stats.**
3. Tongti Zülur: **Wb. Lanuzulu Aier, Section Officer, NU.**
4. Repsem Zülur: **Wb. Tekatemsu Imchen, Joint Dir., Agriculture.**

METETDAKTSÜR:

1. Tanabuba Sentong lokti chiyungba sulen tenzüktsü. Yimpoksür - Ao Senden.
2. Ibai Ao Officers' Telungjem Senden mezüngbuba alima rangben nungi atenshia amongtsü alinung züngsem ajak asoshi kanga tongtipang senden ka asütsü. Anungji ajak medema arua iba sentong nung shilem agitsü mepeshia ayongzüker.

Serbia police-i
longkak aiterem dak
tear gas khaloktsü

Novi Sad, Rongjui/September 6 (Agencies): Serbia kübok Novi Sad yimti nung sorkar anema longkak aiterem azüoktsü atema police-i tear gas aser stun grenade tem khalokja liasü. Serbia nungertemi election agitsü aser tir Aleksandar Vucic-i aniba sorkari küm 12 tashi linük yimsüsüba aruba ya anentsü khangar arudar.

Hokolbarnü yimti indang state university campus nung nüburtem meyrejang aika longkak aitsü atema adenshia liasü. Taoba küm November ita Novi Sad train station kilem chirepa nisung 16 asüba sülen nüburtemi sorkar anema apuso tenzük aser ita 10 sülen parnoki maneni sorkar anema nokdak tenzükogo.

Iba lendong atalokba sülen nüburtemi sorkar dak temlung masüba jateta adok tenzük. Serbia nung aikati state infrastructure project tem sentoka toktsüba aser ochi mashi inyakyim aliba ajanga iba lendong atalok ta shia tir Vucic mapa nungi anentsü takhangba agüja liasü.

"Vucic anenang," ta lokti-i ayimtenba den parnok campus leni jaja aoba mapang election takaratiba nung agitsü takhangba agüja yimiyim ayima liasü. Iba mapang police temi parnok senshidaktsütsü atema tear gas aser stun grenade tem khalokja liasü.

Beta news agency-i ashiba agi, longkak aiteremi police dak flare aser bottle tem mereplokja liasü.

Hokolbarnü nikongtsütsü osangbenertem den sensaksemba mapang tir Vucic-i ashiba agi, iba lendong nung police 11 yirua liasü. Longkak aiterem kwi yiru iba indang osangbo kecha mali.

"Onoki state institution tem raksatsü memelatsü," ta Vucic-i osangbenertem dang ashi. "Serbia ya tashitait aser khuret angatetba state ka lir."

Paisa, sorkar anema nüburtemi nokdakba atema bendanger security services tem aitsüogo aser ashiba agi, pa pusemertemi Deobarnü Serbia kübok yimti balala nung rally tem ayongzüka agitsü.

State Red Run 2025 sentong takok ngua agiogo



Dimapur, Rongjui/September 6 (TYO):

Nagaland Olympic Association (NOA) aser Nagaland Athletics na den longjemer Nagaland State AIDS Control Society (NSACS)i ayongzüka September 6 nü Regional Centre for Sporting Excellence, Sovima, Chümoukedima nung State Red Run 2025 sentong kanga takok ngua agiogo. Taküm iba sentong ya "Run for Awareness, Run Against HIV and STIs" omen nung ajemdaker agia liasü.

Sentong ya Dr. Ahu Sekhose, Project Director, NSACS-i lokti pela agizükba den tenangzüktepba agiba sentong agir tenzüka liasü.

Taküm iba sentong nung State Level Red Run 10K (Men & Women) aser Open 10K (Men & Women) category ana nung asayartem toktepa liasü.

Open 10K races ya

Secretary General & Vice President, Athletics Federation of India (AFI) Abu Metha-i tenzüksü.

Ajak senteper iba asaya atema asayar 224-i parnok tenüing züngoksema liasü aser iba ajanga lokti-i iba sentong nongita yariba sayur.

Sempet lemtsüba sentong ya Multidisciplinary Stadium, Sovima, Chümoukedima nung agi, kong Abu Methaand Dr. Ahu Sekhose, Project Director, NSACS nungeri o tatsütsü jembia liasü.

State Red Run 2025 result: State Level 10K (Men):

* 1st: Mr. ChangsangWongto (Tuensang)

* 2nd: Mr. Temjensanen Pongen (Mokokchung)

* 3rd: Mr. Takasanen Longkumer (Mokokchung)

State Level 10K (Women):

* 1st: Miss Tsuchoi T (Dimapur)

* 2nd: Miss Niansai T (Dimapur)

* 3rd: Miss Jemie Y (Tuensang)

Open 10K (Men):

* 1st: Mr. Wede Tmero (Phek)

* 2nd: Mr. Ringhorsem Muinao (Assam)

* 3rd: Mr. ThotngacheirinHunphun Luiyi (Senapati)

* 4th: Mr. Arjun Chetri (Assam)

* 5th: Mr. Nagalong T Tikhir (Dimapur)

Open 10K (Women):

* 1st: Miss Makakmayum Minarashi (Assam)

* 2nd: Miss Peiheiteile Esalung (Peren)

* 3rd: Miss Rutseinuo (Chümoukedima)

* 4th: Miss Anjali Kumari (Dimapur)

* 5th: Miss Ilungkual Newme (Chümoukedima).

Suarez nem asaya trok atema tenokdangba agütsü



Luis Suárez

Rongjui/September 6, 2025

(Agencies): Taoba hopta Leagues Cup final nung Seattle Sounders makokba asaya nung Inter Miami forward Luis Suárez-i mebenshitsü yimya benshiba atema pa nem asaya trok asoshi tenokdangba agütsüogo, ta asayamung disciplinary ketdangsürtemi metetdaksü.

Arishi küm 38 tain Uruguay nunger asayar shiba taoba mapang Liverpool, Barcelona aser Atlético Madrid nungi kanga takok ngua asayaogo, pai asaya tembangba sülen Sounders staff ka dak metzü metsülöksüba ngutetba sülen tenokdangba agüja liasü.

Pa nem tenokdangba agütsüba ya taruba küm Leagues Cup asayaba mapang benoktsü, saka Major League Soccer-i pa nem temerenshi talila agütsütsü akok.

Iba asaya tembangba sülen mangatettep adokba nung densema alir ano asayar ishika nem tenokdangba agütsüogo. Inter Miami midfielder Sergio Busquets nem asaya ana aser defender Tomás Avilés nem asaya asem atema tenokdangba agüja liasü. Seattle team nungia coaching staff member Steven Lenhart nem asaya pongu atema tenokdangba agütsüogo.

Lumen Field nung Suárez-i

arishi küm 20 tain Obed Vargas dak tekong nung alenba sülen team ana tsünga tensa mejungi aküm.

Suárez-i Brehostibarnü Instagram ajanga iba tatalokba dak sendakba nung takok meshiogo.

"Asaya tembangli tezü kanga danga aliba mapang iba ya atalok, saka iba ajanga ni kechi inyakogo aji shitak mekümdaksür," ta Suárez-i zülutsü.

"Ni aibelenogo aser ni kanga sasar. Kechi atalokogo iba atema ni mepelar aser kü inyakyim ajanga yirur alir ajak dang tatok meshir," ta paisa ashi.

Suárez asaya aruba mapang mepetmesü adokyonga aruba nung iba tatalokba ya-a ka liasü. 2014 World Cup nung Italy nunger asayar Giorgio Chiellini dak angoba atema pa nem tenokdangba agütsü aser club jenjang nunga tangar dak angoba atema pa nem aiben tenokdangba agütsüogo. 2011 küma pai Patrice Evra racially abuse asüba atema asaya ti asoshi tenokdangba agüja liasü.

Maneni 2010 World Cup nung Suárez-i goal line nung pa teka agi ball ka nokdanga Ghana team semifinal-i aitsü aliba nokdangba sülen pa ajaki aija liasü.

BCCI-i Australia den asayatsü atema India A squad sangdongogo

Rongjui/September 6, 2025

(Agencies): Board of Control for Cricket in India-i, Australia A den Lucknow nung four-day match ana atema India A squad nung asayar 15 tenüing sangdongogo. Iba team ya Shreyas Iyer lenisüba nung asayatsü.

Asayamung ya September 16 nü tenzüksü aser September 23 nü nungi tenzüka asayatsü aliba tanabuba asaya nung KL Rahul aser Mohammed Siraj nata adentsü.

September 9 nü nungi tenzüka UAE nung asayatsü aliba Asia Cup atema Iyer ya India team nung mezüngoksem. Pa tang Bengaluru nung Duleep Trophy semi-final nung West Zone nungi Central Zone den asayadar.

India A team nung asayar tejen aser tasentem ajak meyoktepa lir. Team nung Dhruv Jurel vice-captain aser wicketkeeper asütsü. Tanga tongtibang asayartem rongnung

Abhimanyu Easwaran aser Devdutt Padikkal, den Sai Sudharsan aser Ayush Badoni nunger densema lir.

Bowler tem ya Prasidh Krishna aser Khaleel Ahmed nati anir asayatsü aser spinners Harsh Dubey, Tanush Kotian, aser Manav Suthar nungeria teyari agütsütsü.

Maneni team nung all-rounder Nitish Kumar Reddy aser leg-spinner Gurnoor Brar nata densema lir.

Tanabuba asaya nung KL Rahul aser Mohammed Siraj na atema asayar ana team nungi atsüngintsü. Asaya anaprongla ya Lucknow nung kasa ground nung dang asayatsü.

India A Squad: Shreyas Iyer (C), Abhimanyu Easwaran, N Jagadeesan (WK), Sai Sudharsan, Dhruv Jurel (VC & WK), Devdutt Padikkal, Harsh Dubey, Ayush Badoni, Nitish Kumar Reddy, Tanush Kotian, Prasidh Krishna, Gurnoor Brar, Khaleel Ahmed, Manav Suthar, Yash Thakur.

US Open: Jannik Sinner aser Carlos Alcaraz na final asayatsü



Rongjui/September 6, 2025

(Agencies): World No.1 Jannik Sinner-i Hokolbarnü US Open tebur kija asaya semifinal nung Felix Auger-Aliassime akokba sülen final tongtetogo, aser pa Alcaraz den asayatsü.

Taküm tang agi tasembenbuba Alcaraz aser Sinner na Grand Slam final nung asayatsü lir.

Hokolbarnü semifinal asaya nung Sinner-i kanga meranga asayar ang 6-1, 3-6, 6-3, 6-4 agi Felix Auger-Aliassime madak takok ngua liasü.

Sinner-i asaya kanga junga tenzü aser mezüngbuba set ya pai 6-1 agi kanga ayong ayonga koka liasü.

Ajisüaka iba sülen Auger-Aliassime-i kanga junga asaya tenzü aser tena tsünga rally talangla asaya liasü. Tanabuba set ya Aliassime-i 6-3 agi akok.

Tasembuba set nungbo Sinner-i maneni pa asayaba yimya dak temulung lemteta asaya tenzü aser asaya 6-3 agi akok. Set pezübuba nung Sinner-i game pongububa nung Auger-Aliassime indang serve break asü aser iba sülen pa idang serve break mesüdaksü asaya 6-4 agi koka liasü.

Tebur kija asaya nung Carlos Alcaraz aser Jannik Sinner na

tawa kanga toktepa asaya arudar aser tena tang tashi nung 14 ben asayar lir, koba Alcaraz-i 9 ben aser Sinner-i 5 ben koka lir.

2025 French Open final nung Alcaraz-i, set pzübuba nung serve ka break südaksür aliba nungi championship point asem kümzükteta asaya aser tie-break ka asayaba sülen iba asayamung koka liasü.

Ajisüaka Sinner-i Wimbledon nungbo Spain nunger asayar ya straight sets nung dang koka grass-court Slam mezüngbuba aser Gland Slam pezübuba koka liasü.

Tenati taoba Grand Slams tenetbo kokogo, koba Federer aser Nadal nati asaya amokbanger asaya aliba mesükteper. Alcaraz-i tang tashi nung Grand Slam pongu koka lir saka Australian Open mekokteti lir aser Sinner-ia French Open mekokti lir.

Maneni tena ya 2008 küm Federer aser Nadal na sülen küm ka nung Roland-Garros aser Wimbledon final nung ajurutepeba mezüngbuba asayar kümogo.

Tena tesüsa Cincinnati Open nung asaya saka Sinner yiruba ajanga asaya tembanga masayatet, ajisüaka tenaprongla anema aliba mapang nungbo asaya shiba akoktsü mejangja.

BILEMDANGANG

**"Asenoki kechi shimer
aji agi asenok jangjar."**